

Avannaata Kommuniani Kommune Qeqertalimmilu ilinniartinnik
pisariaqartinneqartunik periarfissanik kingunerisinnaasaannillu
qulaajaaneq pillugu nassuiaasiaq

Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik
November 2023

IMAI	2
AALLARNIUT	3
TUNULIAQUTAASUT	5
ILULISSANI GUX -IMIK PILERSITSINEQ	6
2020 -IMI NALUNAARUSIAQ GUX -IMIK ILULISSANI PILERSITSISINNAANEQ PILLUGU	7
TAKORLUUKKAT MISISSORNEQARTUT PINGASUT, ILULISSANI GUX -IMIK PILERSITSISINNAANERMIK:	9
Ilinniarnertuunngorniarfimmik nutaamik Ilulissani sananeq:.....	9
GUX-imi ingerlatsinernik Ilulissani Perorsaanermik Ilinniarnertuunngorniarfimmik aallartitsineq:	10
eGUX -imik periarfissatut iluaquteqarneq:	10
PERORSAANERMIK ILINNIARFIMMI NAAMMASSISINNAASAT ANNERTUSSUSIAT	11
EQIKKAANEQ:	12
AASIANNI INUUSSUTISSARSIUTINUT ILINNIARFIMMIK NUTAALIORFIUSUMIK PILERSITSINEQ	14
AASIANNI ILINNIARTITAANEQ NIPILERSORNIKKUT KULTURIMIK AAMMA KULTURIKKUT KINGORNUSSANIK	14
NIPILERSORNERMUT BACHELORINNGORNIARTARNERMIK PILERSITSINEQ:	15
INISSISIMAFFIK AAMMA SULEQATIGISASSAT:	15
Aasianni inissiineq:.....	15
Sisimiuni inissiineq:	16
EQIKKAANEQ:	16
ILULISSANI TAKORNARIARTITSINERNUT SAMMISUNIK AALLUSSIVIOUSUMIK ILINNIARTITAANERMIK PILERSITSISINNAANEQ	18
AVANNAATA KOMMUNIANI SULIFFEQARNERMI PISARIAQARTITSINERNIK QULAAJANERIT:	18
Ilulissani ilinniarnertuunngorniarfimmik pilersitsinissaq takornariartitsinermi ilinniartitaanernik imaqartumik	18
Naammassisinnaasat inissiat iluaqutigineqarneri aamma aningaasatigut nukiit pigisat:.....	19
Takornariartitsinermik ingerlatsiviusumik inuussutissarsiummik isumannaallisaaneq aamma ineriartortitsineq:.....	20
Ilinniartitaanikkut suliniutinik ineriartortitsineq suliffeqarnermi pisariaqartitat naapigiarumallugit:	20
EQIKKAANEQ:	21
SILAANNAAP PISSUSAANUT TUNNGASUMIK ILINNIARTITAANERMUT INGERLATSIVIMMIK ILULISSANI PILERSITSISINNAANEQ	21
PERIARFISSAT:	22
Pilersaarusiulernissamut piareersaatit Silaannaap pissusaanut atatillugu ilinniarnertuunngorniarfimmik inuussutissarsiummik isumannaallisaaneq aamma ineriartortitsineq:	23
EQIKKAANEQ:	23
NAGGASIUT	23
ILANNGUSSAQ 1:	25

Aallarniut

Nassuiaasiaq manna suliarineqarpoq suleqatigalugu ataatsimiititaliaq siunnersuisartooq Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat nr. 10, 19. maj 2010 -meersumi § 4 naapertorlugu. Ataatsimiititaliap katitsigaanera llanngussami 1 -imi takuneqarsinnaavoq.

2021 -p ukiaani Inatsisartunut ilaasortat marluk aalajangiiffigisassatut siunnersuutinik assigiinngitsunik marlunnik Inatsisartunut suliaassanngortitsippat.

UKA 2021/95 Inatsisartunut ilaasortamit, Doris J. Jensen, Siumut, siunnersuutigineqarpoq: "Naalackersuisut Kommune Qeqertalimmi aamma Avannaata Kommuniani campusimik pilersitsinissaq siunertaralugu suliniutit suut aallartinneqassanersut misissueqqullugit peqquneqarnissaannik Inatsisartut aalajangiiffigisassatut siunnersuut. Misissuinerimi ilaatigut qulaajarneqassappat, Aasianni GUX-ip pitsaassusaanut aammalu tiguneqarnissamat toqqammavigisat allannguutaanngitsunik, Ilulissani GUX-imik pilersitsinissamat suliniutit pisariaqartut. Misissuineq juli 2022 naatinngit saqqummiunneqassaaq."

Kiisalu

UKA 2021/107 Inatsisartunut ilaasortaq, Kristian Jeremiassen, Inuit Ataqtigiit, siunnersuuteqarpoq: "Nuna tamakkerlugu Aasianni inuussutissarsiornermik ilinniarfiliortoqassappat pitsaaqutaanik ajoqutaanillu nassuiaammik UPA2023-imi saqqummiusseqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Naalackersuisut nalunaarusiornermi ilinniartitaanerup iluani inuussutissarsiornermik ilinniarfimmik nutaaliorfiusumik nutaamik sanasoqarnissaanut pisariaqartitsisoqarnera eqqarsaatigissavaat".

Ullormut oqaluuserisassat ukua pineqartut marluk Inatsisartut ilinniartitaanermut ataatsimiititaliaannut ingerlateqqinneqarput suliaassanngorlugit, ataatsimiititaliarlu isumaqatigiittoq imaattumik allannguutissatut siunnersuuteqarpoq, taamaasillunilu immikkoortoq 95 aamma immikkoortoq 107 ataatsimoortutut oqaluuserineqarsinnaanngorlugit:

"Kommune Qeqertalimmi aamma Avannaata Kommuniani ilaatigut GUX-imik inuussutissarsiutinut ilinniarfinnik qaffasinnerusumillu ilinniarfinnik pisariaqartitsinerinik kingunerisasaanillu qulaajaaviusumik UPA 23-mut misissuinerinik suliaqatigullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinerimi kommunit ilinniartitaanerillu attuumassutillit, kiisalu ilinniartitaanermut tunngasuni misilittakkat suliniutillu ingerlasut sapinngisaaq tamaat ilaatinneqassappat". Inatsisartut ilinniartitaanermut ataatsimiititaliaata pingaaruteqartutut isigaa ilinniartitaanernik nutaanik ilinniarfinnillu pilersitsisarnerit pisassasut suliffeqarnermi pisariaqartitsinerinut naapertuuttunik, minnerunngitsumillu kommunini ukunani marlunni pisariaqartitsinerinik tunngavilimmik. Inatsisartut ilinniartitaanermut ataatsimiititaliaat isumaqarpoq naleqquttuusooq Naalackersuisut isumaliutigisappassuk iluaqutissartai Perorsaaneermik Ilinniarfiup aamma Ilulissani GUX-ip ilaatinneqarnissaat, minnerunngitsumik isumaliutigisariaqarmat isumaginninnermut ilinniartitaanernik nutaanik ineriartortitsisoqarnissaa Perorsaaneermik Ilinniarfimmik.

Ataatsimiititaliami suliat aallartinneqarneranniit piffissaq sivilsunngitsoq ingerlareersaq Inatsisartunut Ilaasortaq Nivi Olsen, Demokraatit aalajangiiffigisassatut siunnersuummik UKA 2022/87 saqqummiussaqqarpoq: "Takornariaqarneq aallaavigalugu ilinniarfiusinnaasumik Ilulissani ilinniartoqarfimmik pilersitsinissamut aalajangiisoqarsinnaanissaanut tunngavissanik Naalackersuisut misissuinaasat pillugu Inatsisartut aalajangiiffigisassaattut siunnersuut. Ilinniartoqarfik minnerpaamik serviceøkonom, Arktisk Turistguide aamma Adventure Guide ilinniakkatut pigissavai. Misissuineq kingusinnerpaamik UKA 2023-mi Inatsisartunut tunniunneqassaaq."

Naalackersuisut naleqquttut isigaat nalilersuineq Nivi Olsen-ip aalajangiiffigisassatut siunnersuutaaniittoq ilanngullugu suliarineqassasoq suliani maanna allartinneqareersuni, siunnersuummillu siullermeerinninnermullu atatillugu imaattumik allannguutissatut siunnersuuteqarlutik:

"Ilulissani ilinniarfimmik pilersitsinissaq pillugu Naalackersuisut misissuinermit suliaqaqqullugit peqquneqarnissaanik Inatsisartunut aalajangiiffigisassatut siunnersuut. Ilinniarfiup minnerpaamik ilinniakkat Serviceøkonom, Arktisk Turistguide aamma Adventure Guide neqeroortigissavai. Misissuineq immikkoortoq 95-imut aamma immikkoortoq 107-imut misissuinermit ingerlareersumut ilaassaaq, kingusinnerpaamillu Inatsisartut 2023-mi upernaakkut ataatsimiilerpata tunniunneqassalluni."

Inatsisartut immikkoortumik UKA 2022/87-imik siullermeerinninnermi suliaasaq Inatsisartut ilinniartitaanermut ataatsimiititaliaannut suliaasangorlugu innersuuppat. Ataatsimiititaliaq isumaqatigiittoq siunnersuutip aappassaaneerneqarnissaanut Naalackersuisut allannguutissatut siunnersuutaat akuersissutigisassatut inassutigaa, taannalu akuersissutigineqarpoq ulloq 4. maj 2023.

Inatsisartut ilinniartitaanermut ataatsimiititaliaata kissaatigaa nassuiaasiaq ataatsimiititaliamut saqqummiunneqassasoq Inatsisartunut agguanneqareeruni. Naalackersuisut aappassaaneerinninnermut akissuteqaammi neriorsuipput nassuiaasiaq ataatsimiititaliamut saqqummiunneqarumaartoq.

Naalackersuisut 2022-imi ukiakkut ataatsimiinnerup kingornagut aalajangerput nalilersuineq suliarineqartussaq ilanngunneqassasoq misissuinermit UKA 2021/95 -imut aamma 107-imut atatillugu.

Taamaasilluni nassuiaasiaq taanna suliarineqarpoq aalajangiiffigisassatut siunnersuutaasimasunut pingasuusunut naapertuuttumik.

Ilanngussaq 2, taaguutit allattorsimaffiat nassuiaasiamut ilanngunneqarpoq fagini taaguutini paatsoortoqarsinnaanera pinngitsoorumallugu, minnerunngitsumik kalaallisut allasimasuni.

Tunuliaqutaasut

Kalaallit Nunaanni inuiaqatigiit ataatsimoortunik annertuunik unammilligassaqarput, minnerunngitsumik nunap immikkoortuini nunassittarnermut tunngasutigut. Ilinniagaqalartartut ikiliartornerisigut, sumi nunassittarnerup ineriartorneratigut imaluunniit allanngoriartorneratigut¹ innuttaasullu utoqqaliartornerisigut, nunami maanna innuttaasut ikittuinnaanerisigut aamma nunatta nunarujussuuneratigut innuttaasullu siammasissumik nunassittarnerisigut sakkortusiarortumik pisariaqartinneqarlutillu amigaatigineqaleriartorput sulisussat piginnaaneqarluartut aamma ilinniartitaanermik ingerlatsiviusut aqqissuulluakkat.

Ilinniartitaanernik ingerlatsivinnik amerlanerusunik pilersitsisoqarsinnaanera periarfissatut unammilligassanut aqqiissutissani isumaliutigineqartarsimavoq. Kisiannili pingaaruteqarpoq akuerissallugu taamatut aqqiiniarsinnaaneq imaanngitsoq aqqiissutissaasuni pitsaannerusoq, tamannalu nammineq unammilligassartaqarsinnaallunissaaq. Pisariaqartitsisoqarpoq peqqissaartumik pissutsinillu assigiinngiiaartunik isiginiarfiusumik isumaliusersornissamik, qanoq ilinniartitaanertigut ingerlatsiviit amerlanerusut naleqqussarneqassanersut ilinniartitaaneri tulleriarinernut atasumik, Kalaallit Nunaanni unammilligassat iliuseqarfigiumallugit. 2024-miit pilersitsisoqartussaavoq arlaannaannulluunniit atasuunngitsunik ataatsimut nunatsinni ilinniartitaanernut siunnersuisoqatigiinnik. Ilinniartitaanernut siunnersuisoqatigiit ilaatigut nakkutigisarissavaat nalilersuiffigisassallugillu ilinniartitaaneri pisariaqartitsinerit, qularnaarumallugu ilinniartitaanertigut neqeroorutaasut inuiaqatigiit ineriartornerannut siunissamilu piumasarineqalerumaartunut naapertuuttuunissaat. Ilinniartitaanernut siunnersuisoqatigiit siunnersuuteqarfigisassavaat naleqqussaansat ilinniartitaanernik aqqissuussinerni tamarmiusuni neqeroorutaasullu pisariaqartitsinerit naapertuuttuuneri.

Pingaaruteqarpoq ileqquusunik aqqiissutissarsisarnerit aamma ineriartortitsiviusunik aqqiissutissarsisarnerit tamarmik isiginiarneqartarnissaat, qularnaarumallugu ilinniartitaanernik ingerlatsinerni Kalaallit Nunaanni pisariaqartitsinerit naammassineqarsinnaaneri piujuaannartitsinermik tunngaveqartunik. Tamatumani piumasarineqarput isiginianerit pissutsinik assigiinngitsorpassuarnik siuariartornitsinnut sunniutaasartut, aamma inuiaqatigiit atugarissaarnerat, inuiaqatigiit aningaasaqarnikkut ineriartornerat kulturikkullu pissutsinik attassineq.

Nalunaarusiamik suliaqarnermi aallaavigineqarput aalajangersimasut aalajangiiffigisassatut siunnersuutaasartut akuersissutigineqarsimasut, ilinniartitaanernik nutaanik pilersitsinissamik pisariaqartitsinernik tunngaveqartut aammalu ilinniarfinnik Kalaallit Nunaata avannaani pilersitsisoqarnissaanik pisariaqartitsinerit. Ilinniartitaanernik ataatsimut pingaarnertut pilersaarusiornermi isiginiagassat, aamma tulleriarisarnerit sanilliunneqartassapput nalunaarusiami immikkoortunik assigiinngitsunik suliarinninnerup aqqaanni, tassanilu ilanngullugit ilinniartitaanernut nutaanut sanilliullugit nalilernerqartariaqarlutik nunami tamarmi

¹ Ilinniartitaanermut Pilersaarut II 2023

ilinniartitaanertigut pisariaqartitsinerit, aamma inuiaqatigiinni immikkoortut assigiinngitsut iluini pisariaqartitsinerit.

Siunnersuisoqatigiinnik pilersitsinikkut kissaataasunullu naapertuuttumik Inatsisartunit misissuinissat peqqussutigineqartut nalilersuinerillu suliarineqarput.

Suliat aallarnisarneqalernerinut atatillugu siunnersuisoqatigiit katersortinneqarput ilisimatitsiviusumik ataatsimiinnermut. Tamatumalu kingornagut siunnersuisoqatigiinni ilaasortat piginnaanerit pigisatik aallaavigalugit ataatsimiititalianut tallimaasunut agguataarneqarput, ataatsimiinnernillu arlaqartunik ingerlatsisoqarluni. Siunnersuisoqatigiit misissuinerit aamma pisariaqartitsinerit nalilersuinerit Avannaata Kommuniiani aamma Kommune Qeqertalimmi tunuliaqutaralugit siunnersuutit assigiinngitsunik oqaasertalersuipput. Suliffeqarnermi sulisussanik amigaaqarnerit aamma pisariaqartitsinerit aallaavigalugit siunnersuutit arlaqartunik suliaqartoqarpoq ilinniartitaanernik aamma pikkorissartitsinerit, kommunini pisariaqartinneqartunik.

Ilulissani GUX-imik pilersitsineq

Immikkoortup matuma siunertaraa misissussallugu Ilulissani ilinniarnertuunngorniarnermik ilinniartitaanermik (GUX) pilersitsisoqarsinnaaneranut, tamatumuuna Aasianni GUX akornusinngikkaluarlugu. GUX tassaavoq qaffasinnerusumik ilinniagaqalersinnaanerit piareersaat, siunertaqartoq ilinniarnertuunngorniartut qaffasinnerusumik ilinniagaqalernissaannut piareersarneqarnissaannik. Ilinniarnertuunngorniartoqarsinnaavoq ukiut marluk imaluunniit ukiut pingasut iluanni, taannalu ammaassisarpoq matunik qaffasinnerusumik ilinniagaqarsinnaanerit Kalaallit Nunaanni imaluunniit nunani allani. Ullumikkut Kalaallit Nunaanni ilinniarnertuunngorniarnertut sisamaapput, ataatsimut ilinniarnertuunngorniartunik 1.300 -missaannik ilinniartoqartunik. Ilinniarnertuunngorniarnertut taakkua inissisimapput Aasianni, Sisimiuni, Nuummi Qaqortumilu. Ilinniarnertuunngorniarnertut tamarmik immikkut ilinniarnertuunngorniartussanut sumiiffinnik qinnuteqarsinnaanerit immikkoortoqarput, kisiannili ilinniarnertuunngorniartussat periarfissaqarput ilinniarnertuunngorniarnertut allami tiguneqarsinnaanerit qinnuteqarsinnaanerit, ilinniarnertuunngorniarnertut ilinniarnertut sammiviinik aalajangersimasunik faginilluunniit aalajangersimasunik ingerlatsisinnaajumallutik. Ilinniarnertuunngorniarnertut tamarmik immikkut sammisanik aallusaqarfigisaminnik ingerlatsivigisaqartarput. Assersuutigalugu GUX Qaqortoq immikkut eqiteruffiusarpoq niuernerit sammisuni, GUX Sisimiut teknikkimut tunngasunik aallussiffiusarpoq. GUX Sisimiut ilinniarnertuunngorniarnertut nutaanersaraat 2009-mi pilersinneqartoq, Aasiaallu 1997-imi pilersinneqarluni allineqarlunilu 2011-imi, sammivinnit tallimaasuniit arfineq marlunnt ingerlatsiviulerluni.

Ilinniarnertuunngorniarnermik ilinniartitaaneq aaqqissuussaavoq semesterimik siullermik (siusinnerusukkut tunngaviusumik ingerlatsinermik taaneqartartoq) ilinniarnertuunngorniarnertut sammivianik ingerlatsiviusoq semesterit aappaanniit arfernannut. Tunngaviusumik ingerlatsineq ukiup affaanik sivilisussuseqartoq ilinniarnertuunngorniarnertut sisamani assigiippoq. Tassani ilinniarnertuunngorniarnertut ilinniartinneqartarput kalaallisut, danskisut, tuluttut, matimatikkimi, kulturikkut fagimi, pinngortitalerinnermik fagimi, ilinniarnertuunngorniarnertut periaatsini - studiemetodik - aammalu timersornermi. Semesterip siullup kingornagut ilinniarnertuunngorniarnertut

ilinniakkami sammivissaani aallartitarput, ukiuni pingajua qeqqanik sivilissuseqartumi. Ilinniarnertuunngorniarnermi sammiviit assigiinngitsut qulingiluaapput qinerneqarsinnaasut.

Ilinniarnertuunngoriarluni ilinniartitaaneq ilaatigut makkuninnga anguniagaqarpoq:

- Inuusuttuaqqat ilinniarsimassusiannik nukittorsaasaneq, qitiutillugu ineriartortitsinermi nunamik namminersortumik piujuaannartitsinermillu tunngavilimmik.
- Qularnaassallugu inuusuttuaqqat amerlanerujartuinnartut ilinniarnertuunngorniarnermik aallartitsisalernissaat.
- Nukittorsassallugu ilinniarnertuunngorniartut atuartitaanermi fagitigut iluaqutissaminnik angusaqartarnissaat.
- Procentingorlugu ilinniakkaminnik naammassisaqartartut amerlanerulersissallugit, taamaatitsiinnartartullu ikinnerulersissallugit, taamalu kalaallit inuusuttaanni procentit annertunerusut ilinniarnertuunngortarnissaat.
- Sulissutigissallugu ilinniartitaanernik aqqissuussinerit nukittorsarneqarnissaat, qammakkatut tunngavioqqullugit nunami namminersortumi, ilinniarluarsimasunik piginnaaneqarluarunillu nunami maani sulissusaqqaqqullugu, inuiaqatigiinni sammivinni suniluunniit.

2020 -imi nalunaarusiaq GUX-imi Ilulissani pilersitsisinnaaneq pillugu

2020-imi nalunaarusiortoqarpoq aallussimum ilinniarnertuunngorniarnarfimmik imaluunniit ilinniarnertuunngorniarnarfimmi ingerlatanik Ilulissani pilersitsisoqarsinnaaneq pillugu. Nalunaarusiaq taanna suliarineqarpoq Naalakkersuisut naalakkersuisooqatigiinnermut isumaqatigiissutaannut 2020-imi akissutitut, oqaatigineqarlunilu soqutiginnittoqartoq Ilulissani ilinniarnertuunngorniarnarfimmik pilersitsisoqarsinnaaneranik misissuinissamik. Nalunaarusiaq taanna taamaattut suliat pingajoraat, siusinnerusukkullu eqikkaasarsimanernik ilaatigut aallaaveqarluni, kisiannili aamma paasisutissanik naatsorsuinerinillu nutaanusunik imaqarluni. Nalunaarusiami 2020-imeersumi qulaajaavigineqarput ilinniarnertuunngorniarsinnaasut tunngaviusut, aningaasaqarneq aamma ilinniagartuunik atorfilinnik periarfissaasinnaasut nutaamik ilinniarnertuunngorniarnarfiliortoqassappat.

Nalunaarusiami 2020-imeersumi ersarissumik eqikkaasoqarpoq nutaamik Ilulissani ilinniarnertuunngorniarnarfimmik pilersitsisoqassappat, taava tamanna Aasianni GUX-imut pitsaanngitsunik kinguneqassasoq, apeqqutaatinnagu ilinniartitaanernut ingerlatsivimmik nutaamik pilersitsisoqassanersoq, imaluunniit SPS-ip illutaani ilinniarnertuunngorniarnarfimmik ingerlatsisoqalissanersoq. Taamaattumik inassutigineqarpoq immikkoortumik nutaamik Ilinniarnertuunngorniarnarfimmik Ilulissani pilersitsisoqassanngitsaq, eGUX-imi periarfissaareersut saniatigut.

Ilinniarnertuunngorniartartut ikiliartornerat aamma GUX-imut qinnuteqartartut amerlassusiat

2020-imi nalunaarusiami aamma oqaatigineqarpoq GUX-imut qinnuteqartartut aallartittusatullu allatsittartut amerlassusiat appariartortut. Aakualu piffissami tassani kisitsisit pingaarnerit:

GUX-imut qinnuteqartut:

	2014	2015	2016	2017	2018	2019	2020
Qinnuteqartut	775	956	841	835	831	707	705

Ukioqatigiiaat annerit 2015 – 2018 ilaatigut pissuteqarput ukioqatigiiaat arlariiusarsimanerannik. Kisiannili ukioqatigiiaat inuusuttuaqqat 2020-ip tungaanut ikiliartorsimapput, tamannalu qinnuteqartartunut toqqaannartumik sunniteqarsimasutut isikkoqarluni, taakkua appariartormata, 2012-illu kingornagut ukioqatigiinni ikinneraallutik.

Ilinniarnertuunngorniarnermik GUX -imi aallartitsisartut amerlassusaat:

	2014	2015	2016	2017	2018	2019	2020	2021	2022
Campus Kujalleq	93	84	72	84	55	48	74	65	37
GUX Nuuk	178	173	167	164	180	172	189	201	154
GUX Aasiaat)	141	103	148	89	118	98	108	82	75
Tech College Greenland	98	86	79	94	87	69	71	53	63
eGUX, GUX	0	0	0	0	0	66	56	62	79
Katillugit	510	446	466	431	440	453	498	463	408

Uannga: naatsorsueqqissaartarfik

Ilinniarnertuunngorniarnermik tamarmik september 2020-imi nalunaarput suli inuttaqanngitsunik inissaqartitsillutik qinnuteqartunik amerlanerusunik tigusinissamut. Erserpoq inissat 580 GUX-imi naammattut, 2020-imilu 500 misserpiaanni tiguneqarlutik. Kisitsisilli taakkua 2022-imi 100-t missaannik ikilisimapput.

GUX Aasianni ilinniarnertuunngorniartut illoqarfik angerlarsimaffigisaat ukioqatigiiaanut pingasunut tamanut agguallugu ulloq 27/8-2020

	Ilinniakkat sammiviini tamani	GUX-P ²
Ilulissat	65	4
Aasiaat	63	6
Upernavik	41	1
Uummannaq	35	2
Qasigiannuit	29	2
Kangaatsiaq	25	4
Qeqertarsuaq	11	1
Nuuk	9	2

² GUX-P inuusuttuaqqanut 15-iniit 22 -inut ukiulinnut sammivoq, immikkut pisariaqartitsisunut ilinniarnertuunngorniarnermik ingerlatsinerminni. Ilinniarnertuunngorniarnernup nammineq saniatigut inuttut ineriartornermik ingerlatsisoqartarpoq sungiusaammillu sulinerimik ingerlatsisoqartarlunissaq.

Sisimiut	7	2
Qaqortoq	3	
Danmark-imi najugallit	2	
Maniitsoq	2	
Nanortalik	2	1
Qaanaaq	1	
Katillugit	295	25

Ersarippoq GUX-imut qinnuteqartut amerlassusii ukiunut siuliinut sanilliullugit appasippata, tamatumalu apeqquserpaa Kalaallit Nunaanni ilinniarnertuunngorniarfiit ilaneqarnissaat pisariaqarnerseq.

Takorluukkat misissorneqartut pingasut, Ilulissani GUX-imik pilersitsisinnaanermik:

Ilulissani GUX-imik pilersitsisoqarsinnaaneramik periarfissat ilisimasaqarfignerulemullugit takorluukkat assigiinngitsut pingasut nalilersuivigineqarput:

Ilinniarnertuunngorniarfimmik nutaamik Ilulissani sananeq:

Takorluugaq una ilaqarpoq ilinniartitaanermut ingerlatsivissamik nutaavimmik tallimanik ilinniakkani sammiveqartumik Ilulissani sanaartornissamik. Taamatut sanaartortitsineq annertoorujussuarnik atortulersuutissanut sanaartugassanut sulisussanullu aningaasaliissutinik aningaasaliissutinik imeqassaaq, pinngitsoorneqarsinnaanngitsumillu Aasianni GUX-imut pitsaanngitsunik sunnuteqassalluni. Ilulissani ilinniarnertuunngorniarfimmik nutaamik sanagaanni ilinniakkat sammiviinik tallimanik qinigassaqarfiusumik, ilinniarnertuunngorniarfittut atuartinneqarneranni pitsaassusissat qaffasissumiissapput. Ukiumi siullermi, ukiut aappaanni aamma ukiut pingajuanni taamaasilluni ilinniakkat sammivii 15-it ingerlassapput. Ilinniakkanik ingerlatsiviusut assigiinngitsut tallimat ilinniarnertuunngorniarfittut qinersinnaasaat klassimi atuatigini ataatsimi 24-nik ilinniarnertuunngorniarfittut, ilinniartunik 120-nik ukioq siulleq atuatoqarfiusaaq. Taamaasillunilu ukiuni pingasuni ilinniarnertuunngorniarfiusumi qaffasinnerpaamik 360-inik ilinniartoqarfiusalluni. Oqaatigineqassaaq ilinniarnertuunngorniarfittut ilinniakkaminnik taamaatitsisarsinnaammata, taamalu ilinniarnertuunngorniarfittut ikinnerulersinnaagaluartut suli ilinniartitsisut amerlassusissamissut amerlassuseqaannartariaqarmata. Periarfissaassappat ilinniakkani sammiviit assigiinngitsut tallimaanissaat, taava ilinniartitsisunik allaffimmilu sulisunik 50-inik atorfinitsitsisoqartariaqassammat. Ukiumoortumik ingerlatsinermut aningaasartuutissat missiliuunneqarput 30 mio. kr.-it missaannut.

GUX-imik Ilulissani sanasoqassappat ilinniarnertuunngorniarfittut 360-inut inissalimmik, 5000 m² -inik angissuseqartumik, missiliorneqarpoq tamanna 230 mio. kr.-it missaannik akeqassasoq. Pisariaqartitsisoqassaaq ilinniartut inissaannik kollegianik ilinniartunut 225-inut sanasoqarnissaanik. Missiliuunneqarpoq ilinniartunut ineqarfissanik 14-16-inik sanaartorneq 570 mio. kr.-it missaannik akeqassasoq. Taamaasilluni sanaartornermut aningaasartuutit katillugit 800 mio. kr.-it missaannik annertussuseqassapput. Sanaartornermut aningaasartuutit 2020-imiit qaffakkiartorsimapput.

Qulaajaanerit ersersippaat nutaamik GUX-imik Ilulissani sananeq pitsaanngitsunik Aasianni GUX-imut sunnuteqassasoq. 2020-imi Aasianni GUX-imi ilinniarnertuunngorniartut 69-it Ilulissaneerput, tassalu ilinniarnertuunngorniartut tamarmiusut 1/5 -delii, ilinniartullu taakkua Ilulissani ilinniarnertuunngorniarnermik ingerlatsissappata, taava Aasianni ilinniartitaanerup pitsaassusissaa ajorseriassaaq, ilinniarfiullu naammassisinnaasai tamakkiisumik iluaqutigineqarsinnaajunnaassallutik. Ilinniartumut ataatsimut ataatsimoortumik aningaasartuutit qaffasinnerulissapput. 2020-imi qulaajaanermi naliliisoqarpoq Ilulissani GUX-imik pilersitsineq Aasianni GUX-ip matuneranik kinguneqassasoq.

GUX-imi ingerlatsinernik Ilulissani Perorsaanermik Ilinniarfimmi aallartitsineq:

Takorluukkami matumani atorineqarput sanaartukkat pioreersut Perorsaanermik Ilinniarfimmiittut GUX-imi ingerlatsinernik pilersitsinermut. Aamma tamatumani aningaasaliissuteqartoqarnissaanik pisariaqartitsisoqarpoq, sulilu aamma Aasianni GUX pitsaanngitsunik sunnuteqarfigisussaallugu. Ilulissani GUX pilersinneqassappat takorluukkat aappaat tunngavigalugu, tamatuma kingunerissavaa Aasianni GUX ilinniakkat sammiviinik marlunnik atorunnaarsitsissasoq. Ilanngullugulu eqqaaneqarpoq ilinniarnertuunngorniarnermik aamma ilinniartut ineqarfiinik piusunik tamakkiisumik iluaquteqartoqarunnaassasoq. Takorluukkat aappaannik tunngaveqartumik ilinniarnertuunngoriarnermik pilersitsisoqassappat tamanna aallarnisarnermut aningaasartuutininik 1,3 aamma 1,5 millioner kr.-it missaannik kinguneqassaaq, aningaasartuutillu taakkua atorineqassallutik atortussanik pisiortornernut, aamma sulisunik ilinniartiteqqinnernut aamma ingerlaqqittumik qaffasinnerusunik ilinniagaqarnernut. Ilinniartut ineqarfissaannik sanaartorerit missiliuunneqarput 55 millioner kr.-inut.

eGUX-imik periarfissatut iluaquteqarneq:

Takorluugaq taanna aningaasartuutininik pitsaanerpaamik atuineramik kinguneqarpoq, iluaquteqarfiugami qarasaasiatigut *e-undervisning*-imik, Ilulissani ilinniarnertuunngorniarnermik ingerlatsinermut. eGUX periarfissaqartitsivoq qinnuteqartunut piginnaaneqartunut illoqarfiit ilinniarnertuunngorniarnermik avataaniittunut malinnaasinnaanermik naammassisaqarsinnaanermillu ilinniarnertuunngorniarnermi ilikkagassanik faginik, ungasissumiillu ilinniagaqarnikkut. 2018-ip aasaani aallartinneqarput ilinniarnertuunngorniarnermi fagit ataasiakkat (eGENK) aamma ilinniarnertuunngorniarnermi ilassutitut pikkorissartarnerit (eGSK) qarasaasiatigut ungasissumiillu ilinniagaqarnertut - *e-undervisning* fagini Tuluttut B, Danskisut A, Matematikki B aamma Uumassusilerineq C. 2019-ip aasaani aallartinneqarpoq ukiuni 2-ni eGUX-imi ilinniagaqartarneq.

Siunertaavoq qularnaassallugu ilinniarnertuunngorniarnermi fagit naammassillugit ingerlanneqarsinnaaneri amerlanerusunit, sumi najugaqarneq apeqqutaatinnagu, atorsinnaallunilu immikkut pitsaassusillit neqeroorutit inersimasunut imaluunniit inuusuttunut meeralinnut, assersuutigalugu kissaateqartunut eqaannerusumik aqqissuussamik ilinniakkamik ingerlatsisinnaanermik. eGUX aamma aqqiussutissatut periarfissaasinnaavoq ilinniagaqarnertut assigiinngitsunik nappaateqartunut, ajornakusoortitsisunut ilinniarfimmi namminerimi klassimi atuaqataasinnaanermut. Ukiumut ilinniagaqartut 100-t missaat eGUX-imi aallartittarput, taakkua

affaat ukiuni marlunni ilinniarnertuunngorniarnermik. Ilinniarnertuunngorniartut siullit 19-it 2021-imi aasakkut ilinniakkaminnik naammassipput, 24-llu ilinniakkaminnik 2022-imi naammassillutik. eGUX taamaasilluni ilinniarnertuunngortartut 8 %-eraat, taamaasillunilu iluaqutaalluni malunnaatilimmik ilinniakkaminnik naammassisartuni, amerlanerusullu ilinniagaqalersarnerannut. eGUX angusisarpoq inunnik siusinnerusukkut anguneqartanngitsunik.

Perorsaanermik Ilinniarfimmi naammassisinnaasat annertussusiat

Perorsaanermik Ilinniarfik ullumikkut neqerooruteqarpoq ilinniartitaanernik nalinginnaasunik sisamanik perorsaanermik suliassa qarfiit iluanni. Taakkualu saniatigut aamma ilaapput pikkorissartitsisarnerit aamma ilinniaqqittarnerit, ilaatigut “Isumaginninnermik suliassa qarfimmi ilinniartitaanertigut suliniutit” aqutugalugit, aalajangiisuusumillu inissisimalluni annertusiartuinnartumik piginnaaneqarluartunik sulisussanik pisariaqartitsinerup naammassiniartarnerani, perorsaanermik ingerlatsiviusuni aamma isumaginnittoqarfimmi fagitigut ingerlatsiviusuni. SPS aallartitsisimavoq ilinniartitaanertigut suliniutinik malunnaatilinnik, siunnerfeqartunillu ilinniartitsinernik, ilinniaqqittarnernik aamma pikkorissartitsisarnernik ilinniagaqartut akornanni sulisuusullu akornanni, piginnaasaqarluartut perorsaa sunngortussanik suliannillu ilinniarsimasutut sulisussanik perorsaanermi isumaginninnermilu. Sulianut taakkununga atatillugu nuussisoqarpoq ilinniartitaanernik marlunnik Perorsaanermik Ilinniarfimmut, isumaginninnerup iluani fagitigut ingerlatsinermut tunngasunik 2020-imi. Qaffasinnerusumik ilinniagaq naatsoq, - ilinniagartuunngorniarneq – isumaginninnermik sulianni siunnersortitut suliffeqaatigaluni ingerlanneqarsinnaasoq, kiisalu aamma siunnersuisutut assistentitut ilinniartitaaneq. Taamaasilluni Perorsaanermik Ilinniarfimmi naammassineqarsinnaasut tamakkiisumik ineriartortinneqarsimapput.

Perorsaanermik Ilinniarfik taamaasilluni qaffasinnerusunik ilinniakkanik arlaqartunik neqerooruteqarpoq, ilinniartitaanernut periarfissanik assigiinngitsunik aamma pikkorissartitsisarnernik, perorsaanermik suliassa qarfimmi aammalu isumaginninnermik suliassa qarfimmi pisariaqartitsinernut nunatsinni atuuttunnet naleqqussagaasunik. Aamma 2023-imi neqeroorutigineqalerpoq immikkut perorsaanermi diplom-ertalimmik ilinniagassaq nutaaq taaguuteqartoq “Diplomuddannelse i Specialpædagogik”, RKV (piginnaasavinnik nalilersuisarneq / realkompetencevurdering) -imik nuussisinnaanermik ingerlatsisarneq suliannik ilinniarsimannngitsunet suliffeqartunet pikkorissartitsisarnerup ilaatut “assaat kialaartut” suliniutigineqarnerisa ilaatut, ilinniagaqartumik periarfissiisartumik piginnaasassanik pikkorissarnernillu peqalernissamik fagini sulisutut professioneliusutut ingerlatsisinnaasunngorlugit. Taamaasilluni aallunneqarput ineriartortitsivigineqarlutillu ilinniagaqarnissamut periarfissat, ilinniagaqalersinnaasunet amerlasuunet sammititaasut. Annertoorujussuarmik pisariaqartitsisoqarpoq Kalaallit Nunaanni inunnik perorsaa sunut ilinniarsimasunik, taamaattumillu ilinniartitaanerit tamakkua aalajangiisuusumik pingaaruteqarput naammattunik piginnaanilinnik sulisussa qarfnissamut, meeqqat, inuusuttuaqqat aamma ilaqtariit tapersersorumallugit, kiisalu inuiaqatigiinni ineriartorneq ataatsimut isigisumik tapersersorumallugu.

Ataqatigiisitsineq aamma ilinniartitaanerit naleqqussakkat: SPS pilersitsinikuuvoq nukittuumik fagitigut aamma perorsaanikkut aaqqissuussanik avatangiisinik. Avatangiisit taakkua aalajangiisuupput ataavartitsinissamut ilinniartitaanerit pitsaassusissaannik qularnaarisuullutillu ilinniagaqartartut pitsaanerpaamik ilinniagaqarnissaannut, tamatumani aamma ilinniartitaanernut pilersaarutunik ineriartortitsinikkut pisariaqartitsinernut piusunut unammilligassanullu naleqqulluurtunik, inuiaqatigiinnik iternganut ilisimasanik tunngaveqartunik.

Taamaattumillu pingaaruteqarpoq akuerissallugu Perorsaanermik Ilinniarfiup pisariaqartitsinera nammineq ingerlatsivigisaminik, attassiinnaajumalluni annertusaasinnaajumallunilu ilinniartitaanertigut suliniutinik. Perorsaanermik Ilinniarfiup illuutai atortuulu tigussallugit Ilulissani ilinniarnertuunngorniarfimmik pilersitsiumalluni pitsaanngitsunik sunniuteqarsinnaavoq ilinniarfiup pisussaaffimminik naammassinninniarneranut pisariaqartitsinernik piusunik perorsaanikkut suliasaqarfimmi, tamannalu pissusissamisussanngilaq isiginiaraanni annertoourujussuarnik pisariaqartitsinerit sulisussanik ilinniarluarsimasunik perorsaanikkut suliasaqarfinni. Perorsaanermik Ilinniarfiup atuallappaa ilinniagaqalerniarlutik qinnuteqartartut akuerineqartartullu amerliartornerat ilinniartitaanerni nammineq ingerlatamini, ilinniartunut inissiaqarnikkut sanaartorluni annertusaasimaneq aamma periarfissaqartitsilermat ilinniarfimmi pisariaqartitsinernut naapertuuttunik ingerlatsisinnaanermik. Naalakkersuineramik suliaqartuniit aalajangiisoqassappat Ilulissani ilinniartitaanernik nutaanik aallartitsisoqarnissaa, taava ilinniagaqartunut inissianik annertusaanissanik pilersaarusaareersut annertunerulertariaqassapput, ilinniartunut inissianik nutaanik suli sanaartoqqinnikkut, ilinniagaqalartartut amerleriaatissaannut naapertuuttunik. Kiisalu aamma ininik ilinniartitsiviusussanik nutaanik aamma pilersitsisoqartariaqassaaq, sulisunut pisariaqartunik allaffittalinnik, kiisalu immaqa aamma sulisunut inissianik pisariaqartinneqartunik, Ilulissani ilinniartitaanernik nutaanik pilersitsinikkut.

Eqikkaaneq:

Misissuinerit takorluukkallu allaaserineqartut qulaajaavigaat periarfissat Ilulissani ilinniarnertuunngorniarluni ilinniartitaanermik aallartitsisinnaanermut atasut. Pissusissamisoortumik kissaateqartoqaraluartoq Ilulissani ilinniartitaanernik nukittorsaanissanik, aamma aalajangiisuuvoq isumaliutigissallugit Kalaallit Nunaanni ataatsimut siammasinnerusumik inuiaqatigiit ilinniartitaanernik ingerlatsinerisa kingunerisassaat.

Ilulissani GUX-imik pilersitsineq: Pingaaruteqarpoq ilisimassallugu ilinniarnertuunngorniarfimmik Ilulissani pilersitsineq taamaallaat najukkami tassani kinguneqartussaangimmat, kisiannili ilinniartitaanernut tamarmiusunut sunniuteqartussaalluni. Taamatut pilersitsineq qularnanngitsumik unammilligassanik arlalinnik kinguneqassaaq, tamatumani aamma aningaasaqarnikkut annertoourujussuarnik kinguneqassalluni. Isumaliutigisassat nalorninarnerpaat ilagaat tamatuma qanoq GUX-it pioreersut sunniuteqarfigissanerai, minnerunngitsumik Aasianni GUX. Ilinniagaqartartut nukiillu atorneqartartut agguarnerisigut ilimanarpoq tamanna kinguneqassasoq ilikkagassatigut – fagitigut avatangiisit annikinnerusut periarfissakinnerusut ilinniartunut aamma atuuttunik tamatuma kingunerissagai. Tamanna kinguneqarsinnaavoq ilinniartitsinermi / atuartitsinermik pitsaassusissat ajornerulernerannik, ilinniarnertuunngorniarartunullu pisariaqartalissalluni ilassutitut fagitigut

pikkorissaqqinnissaq ilinniarnertuunngoreernermi suliarisariaqartassasoq. Isumaliutissiissutit tamakkua tunuliaqutaralugit inassutigineqanngilaq Ilulissani GUX-imik pilersitsisinnaanerup malersoaqqinnissaa.

Perorsaанermik Ilinniarfiup ingerlatsiviinik aalajangiusimanninnissaq: Perorsaанermik Ilinniarfik qitiusumik inissisimavoq suliaqarlunilu perorsaанerup iluani fagitigut piginnaanilinnik ilinniartitaanerni. Ilinniartitaанermik ingerlatsiviup ilinniartitaанerit pisariaqartinneqartut naleqquttullu neqeroorutigai, eqaatsumik periaaseqarneq aamma pitsaassusissat annertoорujussuarmik pingaaruteqarput inuiaqatigiinni pisariaqartitsinerit tamakkua naammassineqartarneranni, ullutsinni perorsaасunik isumaginninnermilu sulisunik amigaateqarneq aallaavigalugu. Perorsaанermik Ilinniarfiup naammassisinnaasai nukiillu atugassai Perorsaанermik Ilinniarfimmitt namminermit iluaqutigineqartariaqarput, perorsaанerup iluani sulisussanik pikkorissunik suli amerlanerusunik pisariaqartitsineq annertusiartortillugu.

Ullumikkut pisariaqartitsineq piusoq isiginiarlugu aalajangiisuvoq ataatsimoortunik isigisumik Ilulissani ilinniartitaанernut tunngasunik apeqqutit aallunneqarnissaat. Tamanna isumaqarpoq ingerlaqqittumik nukittorsaasoqarlunilu ilalersuisoqassasoq Perorsaанermik Ilinniarfimmik, kiisalu ilinniarnertuunngorniарluni ilinniartitaанernik maanna pioreersunik, taakkualu ilaginngilaat Ilulissani GUX-imik nutaamik pilersitsinissaq.

Aasianni inuussutissarsiutinut ilinniarfimmik nutaaliorfiusumik pilersitsineq

Kristian Jeremiassen-ip aalajangiiffigisassatut siunnersuutaa UKA 2021/107 Naalakkersuisunik pisussaaffiliivoq nassuiaasioqassasut iluaqutissat aamma ajoqutaasinnaasut nunamut tamarmut atuuttumik Aasianni inuussutissarsiutinut ilinniarfimmik, nipilersornermut ilinniarfimmik pilersitsisoqassapat.

Aasianni ilinniartitaaneq nipilersornikkut kulturimik aamma kulturikkut kingornussanik

Nassuiaasiortoqassaaq iluaqutissanik ajoqutaasinnaasunillu nunamut tamarmut atuuttumik inuussutissarsiutinut ilinniarfimmik Aasianni pilersitsisoqarsinnaanera pillugu, immikkut isiginaasumik ilinniartitaanerni pisariaqartinneqartunik aamma nuna tamakkerlugu ilinniartunngortartut ikiliartornerannik. Siunnersuut nunami tamarmi atuuttussamik inuussutissarsiutinut ilinniarfiliorsinnaanermik, soorlu nipilersornermik ilinniarfimmik, ilinniartitaanermik ingerlatsivimmik kulturikkut kingornussagut pillugit, oqallisigineqarsimavoq apeqqummillu ineriartortitsisoqarsimalluni ataatsimiititaliami siunnersuisartuusumi. Ataatsimiititaliami tassani nalilersuivigineqarsimapput iluaqutissaasinnaasut aamma akornutaasinnaasut ilinniartitaanermut ingerlatsiviliornermi, sammisamullu atatillugu isummersuisoqarsimalluni. Tulliuttuni saqqummiunneqassapput isumaliutissiissutaasut, immikkut isiginiarlugit iluaqutissaasinnaasut unammilligassallu, Kalaallit Nunaanni ilinniagaqarnissamik maanna pisariaqartitsinerusut eqqarsaatigalugit.

Ilinniarfimmi neqeroorutaassapput ilinniartitaanerit nipilersornermut attuumassuteqartut siammasissumik, tamatumanissaaq erinniorneq, nipilersugassiorneq, elektroniskiusunik nipilersorneq, nipilersoriaatsit nalinginnaasut ileqquusullu aamma eqqumiitsuliorneq.

Avammut niuorneq aamma kulturikkut eriaqisassat isumagineqarnerat siuarsarumallugu siunnersuutigineqarpoq Qasigianguani katersugaasivik suleqatigalugu, - nunaqarfimmik uumassusilimmik ineriartortitsiviusimasoq – ilinniartitaanermik ingerlatsiviliortoqassasoq kulturikkut kingornussagut pillugit. Tupermi unnuisarneq, kalaallit qanga atisaat, kalaallit qanga sakkui assilillugit mikisunngorlugit sanaanik iluaquteqarluni ilinniartitaanernik suliniuteqartoqarsinnaavoq, aningaasarsiornermik siuarsaataasussanik. Aamma nunaqarfik uumassusilik Qasigianguit katersugaasiviata eqqaaniittoq sungiusaammik suliffittut atorneqarsinnaavoq. Ilinniartitaanermik ingerlatsivimmik kulturikkut kingornussatsinnut tunngasumik pilersitsinermi makkuninnga qinigassaqarpoq: amernik qassaaneq – suliareqqiineq, qisuit atorlugit assassukkanik eqqumiitsuliorneq, qaanniorneq, umialiorneq, qaannami atortunik sanaartorneq, ameq atorlugu tupernik sanaartorneq, qanga pinngussanik nalinginnaasimasunik sanaartorneq, ivikkanik ikaartitserineq, ujaqqanik pinnerasaasiorneq, naatitanit tunngavilinnik nioqqutissiorneq, kalaallit timersuutitoqaat, qimusserneq, qajartorneq, timi atorlugu nalinginnaasumik sulisarneq.

Kulturimik ilinniarneq aamma kinaassutsimik attassiinnarneq: Ilinniarfimmi aallunneqassaaq Kalaallit Nunaanni kulturimik tunngaveqartunik nipilersornermik ingerlatsineq ileqqutoqqallu, kulturikkut kinaassuseq pigiinnarumallugu. Tamanna aamma issittumi nipilersuutinut qitiusumik ilisimasaqarfiusumik pilersitsissaaq.

Ersarinnerusumik qulaajaanissamik pisariaqartitsineq: Pisariaqartitsisoqarpoq itinerusumik peqqissaartumillu uppersaasiornissaq nukinnillu atorneqartussanik pilersaarsiornissaq, aalajangiukkumallugu ilinniakkat suut pivusorsiortuuneri ataavartuusinnaanersullu. Pisariaqartitsisoqarpoq aningaasartuutissanut missingersuusianik eqqortunik, aamma kvadrat meterimut akiusunik, nalilersuivigiumallugit nipilersornermik ilinniarfimmik pilersitsineq aamma ingerlatsineq. Sumiiffissap aalajangiunneqarnissaa pingaaruteqarpoq, kisianni aamma aalajangiisuuvoq naammattumik aningaasaliinnaassuseq.

Nipilersornermut bachelorinngorniartarnermik pilersitsineq:

Ilinniartitaanermi ilaassapput nipilersornermik tunngaviusumik pikkorissartitsisarneq aamma nipilersornermik bachelorinngorniarluni ilinniagaqartarneq. Ilinniartitaanermut isernissamut atatillugu piumasaqaataassapput nammineq misilittagareriikkat, piginnaanerit aamma ilinniartitaanermi tiguneqarsinnaanermik misilitsinneq, tamannalu periarfissiissalluni immikkut sammivimmik ilinniagaqarsinnaanermik, soorlu erinniornermi, elektroniskiusunik nipilersuutunik atuinermi aamma rytmiskimik nipilersorneq.

Suliffissanik pilersitsisinnaaneq: Nipilersornermi ilinniartitsisut taamaallaat nipilersornermik ilinniarfimmi meeqqallu atuarianni atorfissaqartinneqassanngillat, kisiannili aamma suliffissarsinnaallutik kulturikkut illorsuarni, kulturikkut ingerlatsivinni allani assigisaannilu.

Inissisimaffik aamma suleqatigisassat:

Isumaliutigisariaqarpoq suleqateqarnissaq ilinniartitaanermik ingerlatsivinnik pioreersunik, soorlu Aasianni GUX-imik nipilersornermik ilinniarfimmik Taseralimmik, atortussallu pioreersut iluaqutigalugit.

Aasianni inissiineq:

GUX-Aasiaat atortoqarpoq nipilersornermik ilinniartitsinermit ilinniartitsisoqarlunilu nipilersornermik misilittagalinnik, siunnersuutigineqarporlu Aasianni GUX-ip inaataani nipilersornermik ilinniarfimmik imaluunniit assingusumik nipilersornermut tunngaviusumik ilinniakkamik pilersitsisoqassasoq, taamaaliortoqarpallu taamaasilluni campus-imik pilersitsisoqassaaq. Oqaatigineqassaaq ilinniarnertuunngorniariup aamma nipilersornermik ilinniarfiup akornanni imminut sunniivigeqatigiinnermik pitsaasumik pilersitsisoqarsinnaammat, nipilersornermik ilinniarfimmi iluaqutigineqarsinnaammata nipilersornermik ilinniartitsisut misilittagallit ilinniarnertuunngorniarfimmeersut. Ilanngullugulu aamma oqaatigineqassaaq katersortarfik aamma GUX-Aasiaat tusarnaartitsinerit atorneqarsinnaammata. Kisianni pisariaqartitsisoqassaaq immikkoortortami pisortassamik atorfinitsitsisoqarnissaanik, soorluttaaq pisariaqassasoq nipilersuutit ilassuserneqarnissaat. Ilinniartunut inissiat amerlisikkiartuaarneqarnerat Aasianni GUX-imi pisariaqartitsinermik tunngaveqarluni uuttortagaavoq. Aasianni ilinniartitaanernik nutaanik pilersitsisoqassappat pilersitsisoqartariaqassaaq ilassutunik nutaanik ilinniartut inissaannik, ilinniartut amerleriaataannut naapertuuttunik.

Sisimiuni inissiineq:

Qeqqata Kommuniani nipilersornermik ilinniarfik Taseralimmiittoq aamma siunertanut atorpeqarsinnaavoq. Kisiannili nipilersornermut ilinniarfik aamma nipilersornermi bachelorinngorniarluni ilinniartitaaneq ataatsimut inissisimassappata naliliisoqarpoq illutatigut avatangiisit pitsaanerulersinneqartariaqassasut. Kommunip nipilersornermut ilinniarfianik allilerineq aningaasartuutissatigut missiliuunneqarpoq 8 mio. kr.-it missaannut. Eqqaaneqarpoq periarfissaasinnaasutut kommunip nipilersornermik ilinniarfiata illutaanik Qeqqata Kommunianiit attartortoqarsinnaasoq, kisiannili aamma eqqaaneqarluni Qeqqata Kommuniata aamma pisortat peqatigiillutik illuutini piginnittuusinnaanerat. Nutaamik sanaartornermik aallartitsisoqassappat sanaartornerq ukiut marluk missaannik sivilisuseqassaaq. Taseralimmi inersuaq atortorissaaruteqareersoq pisariaqartunik ilinniartut tusarnaartitsinerinut atorpeqarsinnaavoq. Ilanngullugulu ilisimatitsissutigineqarpoq misilittagaqarfigineqartoq ingerlatsivinnik allanik suleqateqartarnek.

Eqikkaaneq:

Nunamut tamarmut atuuttussamik nipilersornermut ingerlatsivimmik kulturikkullu ingerlatsivimmik Kalaallit Nunaanni pilersitsisinnaaneq, imaluunniit bacheloritut ilinniartitaanermik nipilersornermi pilersitsisinnaaneq periarfissaapput soqutigintut nipilersornermik ilinniartitaanermut aningaasaliisinnaanermut kulturikkullu kingornussanik attassiinnarsinnaanermut. Pisariaqarpoq aalajangiisuullunilu peqqissaartunik nalilersuinernik suliaqartoqarnissaa, pisariaqartunik uppernarsaatini katersisoqarnissaa aammalu ingerlatsivinnik pioreersunik suleqateqartoqarnissaa, tamanna piviusunngortinniarlugu. Nipilersornermik ilinniartitaaneq bachelorinngorniarnertut ingerlanneqassappat piimasaavoq ilinniartitsisut nipilersornermut konservatoriami ilinniarsimasuunissaat.

Kalaallit Nunaanni inuussutissarsiornermi suliffissat ingerlaavartumik ineriartorfigisaanni, aammalu sulisusanik sulianik ilinniarsimasunik inuussutissarsiutit sammiviini arlaqartuni annertusiartuinnartumik pisariaqartitsiviullunilu ujartuiffiusuni aalajangiisuuvoq isumaliutersuutigissallugu ilinniartitaanernik ingerlatsiviusut pineqartut qanoq naleqqussarneqassanersut, suliffeqarnermilu pisariaqartitsinerit qanoq iliuuseqarfigineqassanersut. Tamatumunnga atatillugu pingaaruteqarpoq oqallisigissallugu qanoq inuussutissarsiutinut ilinniarfimmik ilinniartitaanernilu attuumassuteqartunik pilersitsinerit tunniussaqaarsinnaaneri, nunatsinnilu sulisussaqroneq pisariaqartinneqartuni piginnaanilinnik ilisimasalinnillu qanoq nukittorsaavigineqassanersut.

Nunanut tamarmut atuuttussanik nipilersornermi kulturikkut aamma kulturikkut kingornussatigut inuussutissarsiornermut ilinniarfimmik pilersitsiniarnermi siunnersuutaasut ataatsimut nalilersuivigereernerisigut ersarissivoq siunnersuutaasut unammilligassanik pilersitsisussaasut, inuussutissarsiornermut inatsisinut maanna atuuttunut tunngatillugu. Aalajangersimasumik pissutsit arlaqartut ajornakusoortippaat siunnersuutit pineqartut maanna killiliussaasut ilanni ataatsimoortinneqarsinnaaneri. Nipilersornermik ilinniartitaaneq siunnersuutigineqartoq inuussutissarsiutinut ilinniartitaanernut nalinginnaasunut sanilliullugu allatut aqqissuussaassaaq. Tamatuma ajornartorsiutissaqarfigisinnavaa inuussutissarsiutinut sammisunik ilinniartitaaneri

iluanni naleqqussarneqarsinnaanera, taakkunani pingaarnertut aallunneqartarmata inuussutissarsiutit ileqqusullu aalajangersimasut iluanni ilinniartitaanerit. Nipilersornermik ilinniartitaanertut siunnersuutigineqartumi pingaartinneqarput immikkut kulturi aamma nipilersornermik ilinniarneq. Tamanna allaaneruvoq nalinginnaasumik inuussutissarsiutinut sammisunik sungiusartitsisarnernut sanilliullugu, nikerartumik ilinniarfimmi sungiusaammillu suliffimmi nikerartumik ilinniartuusarneq ilinniartitaanermut atatillugu eqqarsaatigalugit, inuussutissarsiutinut ilinniartitaanernut inatsimmi nalinginnaasumik aalajangersarneqartutut. Ilinniartitaanermut ingerlatsivimmik pineqartutut ittumik pilersitsisoqarsinnaanera isumaliutigeqqissaagassaavoq inatsisitigut aningaasaqarnikkullu pissutsit eqqarsaatigalugit. Pisariaqartitsisoqassaaq inatsisinik malittarisassanillu allanik naleqqussaansat ilinniartitaanerit pineqartutut ittut ingerlanneqalissappata.

Ataatsimut isigisumik ilimanaateqarpoq suliassaq piuminaatsuussasoq siunnersuutigineqartup nipilersornermik ilinniartitaanerup maanna inuussutissarsiutinut ilinniartitaanerup iluanut inissinniarnissaa. Pisariaqartinneqarput inatsisitigut ingerlatsiveqarnikkullu naleqqussaansat, kiisalu peqqissaartunik nalilersuinerit qanoq aqqissuussinikkut immikkut nipilersornikkut ilinniartitaanernik Kalaallit Nunaanni pisariaqartitsinerit naapigiarneqarsinnaanersut eqqarsaatigalugit.

Ilulissani takornariartitsinerit sammisunik aallussiviusumik ilinniartitaanermik pilersitsisinnaaneq

Aalajangiiffigisassatut siunnersuummi UKA 2022/87 -imi saqqummiussivoq Nivi Olsen, Demokraatit, siunnersuummik Naalakkersuisut peqquneqassasut suliaqarnissamik nalilersuinerimik Ilulissani ilinniartitaanernut ingerlatsivimmik pilersitsisoqarsinnaanera pillugu, takornariartitsinerimik immikkut aallussiviusussamik. Ilinniartitaanernik ingerlatsivissaq minnerpaatut neqerooruteqassaaq kiffartuussinerni aningaasarsiornikkut ilisimasalittut Serviceøkonom-itut ilinniartitaanermik aamma Issittumi takornariartitsisartutut ilinniartitaanermik aammalu takornariartunik immikkut misigisassarsiortunik takornariartitsisartutut Adventure Guide-tut ilinniartitaanernik.

Avannaata Kommuniani suliffeqarnermi pisariaqartitsinerimik qulaajaanerit:


Avannaata Kommunian inissisimavoq unammilligassaqarfiusumik sulisussatigut amigaateqarneq eqqarsaatigalugu, tamatumani minnerunngitsumik akunnittarfinni sulisussanik, kisiannili aamma sanaartornermi sulisussanik. Qulaajaanerit ersersippaat Avannaata Kommunianiittut akunnittarfiit piffissami matumani sulisussaminnik 33-nik amigaateqartut, sanaartorfinilu sulisussanik 93-inik amigaateqartoqartoq. Avannaata Kommuniani inuussutissarsiornermut ataatsimiititaliallu suliarisimavaa nalunaarusiaq takornariartitsinerit iluanni sulisussanik pisariaqartitsinerimik qulaajaavusoq. Avannaata Kommuniani takornariartitsinerit iluanni sulisussanik pisariaqartitsinerimik nalilersuinerimik suliat ersersippaat sulianik ilinniarsimasunik sulisussanik amigaateqarnerit, minnerunngitsumik tikerartitsisartunik, takornarianik angallassisartunik aammalu allaffissornikkut sulisussanik. Ilanngullugillu amigaatigalugit ujartorneqarput pikkorissartitsisarnerit tuniniaasarnerimik, kiffartuussinermik aamma oqaatsini pikkorissartitsisarnerit. Ilaasunik imaatigut angallassisarnerni sillimaniarnikkut atugassarititaasut pitsaanerulersikkumallugit pisariaqartitsisoqarpoq ilinniarsimasunik pikkorissaqqissimasunillu sulisussanik, soorlu matrosinik aamma imaani sillimaniarnerimik ilisimasalinnik allanik. Sulisussanik pisariaqartitsinerit sulii annertunerulertussatut naatsorsuutigineqarput Ilulissani timmisartunut mittarfissuup ammareernerani. Piffissami ukiup ilaani takornariartitsinerup ilaffiusarnerani sulisussanik amigaateqarneq maanna malunnaataalereerpoq.

Ilulissani ilinniarfimmik pilersitsinissaq takornariartitsinerimik ilinniartitaanernik imaqartumik

Takornariartitsinerimik ilinniartitaanernik pisariaqartitsinerit nalilersuivigineqarnissaanni qitiusumik aalajangiisuupput ilinniagaqalersinnaasut tunngavigineqartussat, ilinniartitaanernillu pineqartunik pisariaqartitsineq qanoq ittuunersoq. Campus Kujalleq ullumikkut takornariartitsinerup iluani ilinniartitaanernik pingasunik neqerooruteqareerpoq. Taakkualu saniatigut sulissutigineqarpoq ukiumik 1-imik sivilissusilimmik ilinniartitaanissaq aasaanerani upernalerneranilu sungiusaammik sulinerimik imaqartussa, Kalaallit Nunaata Avannaani sulisussaqaarniarneq iliuuseqarfigiumallugu aqqissuussaasussa. Campus Kujalleq aamma ukiuni qulini misilittagaqarpoq takornariartitsinerimut sammisunik pikkorissartitsinerimik neqerooruteqartarnerimik.

Campus Kujallermi takornariartitsinermik ilinniartitaanermut qinnuteqartartut agguataarneri:

Kisitsisit paasissutissat ersersippaat kommunikkaartunik qinnuteqartut agguataarsimaneri, Campus Kujallermi serviceøkonomitit ilinniartitaanermut aamma takornariartitsisartut ilinniartitaanermut qinnuteqarsimasut.



Naammassisinnaasat inissiat iluaqutigineqarneri aamma aningaasatigut nukiit pigisat:

Ilinniarfimmik pilersitsisarneq aamma ilinniarfimmik ingerlatsineq aningaasaqarnikkut nukissanik annertoorujussuarnik pisariaqartitsiviusarpoq. Ilulissat aamma Campus Kujalleq tamarmik ilinniartitaanermik assigiissumik neqerooruteqartassappata ingerlatsiviusuni arlariinni nukiit pigineqartut naammattumik iluaqutigineqanngitsoorsinnaapput. Tamanna aningaasaqarnikkut ingerlatsineq eqqarsaatigalugu pissusissamisuussanngilaq naammassisaqarfiulluassananilu.

Campus Kujalleq tunngavilersuivoq Ilulissani ilisimatusarnermik qitiusumik ingerlatsivimmik takornariartitsinernut sammisumik pilersitsisoqarnissaanik, ilinniartitaanerit pioreersut assinginik pilersitsisoqarnissaanut taarsiullugu. Qitiusumik ingerlatsiviup taassuma ilinniartitaanerit pioreersut ilalersussavai, nunallu immikkoortuani ilisimatusarnek nukittorsassallugu.

Takornariartitsinermik ingerlatsiviusumik inuussutissarsiummik isumannaallisaaneq aamma ineriartortitsineq:

Ataatsimiititaliap siunnersuisartuusup erseqqissaatigaa pingaaruteqarluinnartoq takornariartitsinerup aningaasarsiornikkut annertusiartortitsiviunerata siuarsarneqarnissaa, Kalaallit Nunaannilu suliffissanik pilersitsiortortoqarnissaa. Kaammattuutigaat suleqatigiinneq piffissamullu ungasissumut periusissiamik suliaqartoqarnissaa, naammassisaqarfiulluurtumik takornariartitsinikkut ineriartortitsisoqaqqullugu, siuarsaaviusunik ilinniartitaanertigut piginnaasanillu ineriartortitsinertigut. Aamma siunnersuuteqarpoq ilinniartitaanermik pilersitsisoqarnissaanik IT-mut attuumassutilimmik, inuppassuit quppersagaanni - sociale medier - ilisarititsisarnernik ingerlatsisussanik ilinniartitsiumalluni, annertusiartuinnartumik online-iusumik nunarsuaq kaajallallugu ussasaarisarnerup takornariartitsisarnermut pingaaruteqarnerujussua sammiumallugu. Unammillernartuusarpoq takornarianut tunngasunik neqeroorutit Kalaallit Nunaanni sumiiffinnut ingerlatsittarneri, amerlasuutigut takornariartitsisartut avataaneersut takornariartitsinermik ingerlatsinerni nuimanerumik inissisimasarmata. Tamatuma sunniuteqarfigisinnaavai najukkani namminerni takornariartitsisartut mikisuaarasartut. Ilulissani timmisartunut mittarfissuaq Atlantikoq qulaallugu angalasunik ilaasunik tikerarfinngorpat ingerlatsilerluni, naatsorsuutigineqarpoq sulisussanik pisariaqartitsineq qaffariaateqarfiussasoq, kisianni aamma unammilleqatigiinnermik annertunerulersitsissaaq nunap sinneranut angalaniartut eqqarsaatigalugit.

Ilinniartitaanikkut suliniutinik ineriartortitsineq suliffeqarnermi pisariaqartitat naapigiarumallugit:

Sulisussanik pisariaqartitsineq akunnittarfeqarnermi, sanaartornermi illuliortitsinermi aamma takornariartitsinermik suliaqarfiusuni ersarissumik suussusilersuisimavoq unammilligassanik saneqqunneqarsinnaanngitsunik, sulisussanik piginnaaneqarluartunik amigaaateqarneq eqqarsaatigalugu. KTI, Inuili aamma Campus Kujalleq maanna neqerooruteqartareerput ilinniartitaanernik aamma pikkorissartitsisarnernik siunnerfilersugaasunik, suliassaqarfinni eqqaneqartuni. Taamaakkaluartoq pinngitsoorani pisariaqanngilaq ilinniartitaanernut ingerlatsivinnik nutaamik pilersitsiortornissaaq. Periarfissaavoq ilinniartitaanernik maanna ingerlatsiviusut ilinniartitaanernik pilersaarutaasa ineriartorteqqinneqarsinnaaneri, inuussutissarsiutit sammiviini assigiinngitsuni pisariaqartitsinerit naammassiumallugit. Inuili tulliuttunik ilinniartitaanernik neqerooruteqarpoq akunnittarfeqarnermut sammisuni, soorlu inuussutissalerinermik assistentit, nerisassiornermi assistentit, igasut, receptionistit aamma saqisut. Neqerooruteqarpoq pikkorissartitsisarnernik aamma sumiiffinni namminerni ingerlanneqarsinnaasunik, ilinniartitaanermik ingerlatsivimmiut pikkorissartitsivissanut angallutik ingerlatsivigisagaannik, assersuutigalugit eqqiluisaarnermut, inuup nammineq eqqiluisaarnerannut tunngasuni, pikkorissartitsisoqartarluni. Inuilimi sulisut illoqarfinni ataasiakkaani pikkorissartitsigaangamik periarfissaq aamma atortarpaat paasisutissiisarnernut ilinniarfiup ilinniartitaanernik neqeroorutai pillugit. Kiisalu aamma ilinniartitaanernik neqeroorutit katitsigaasarput Inuilimi ilinniagaqartut sungiusaammik suliffigisatik qimaqqasarlugit sap. ak. 10-20-ini, ilinniarfimmi atuarnermi. Ilinniarfimmi atuarnarpoq piffissami sivikinnerusumi ingerlanneqartarpoq, nalinginnaasuimik inuussutissarsiutinut ilinniartitaanerni ilinniagaqartarnernut sanilliullugu. Ilanngullugulu Campus

Kujallip ukiut qulit sinnerlugit annertussusilimmik misilittagaqarfigaa takornariartitsinermit³ tunngasuni pikkorissartitsisarnerit, assigisaanillu KTI -mi pikkorissartitsisarnerit immikkoortortaq ukiunit amerlasuunit pikkorissartitsisarneri misilittagaqarluni.

Eqikkaaneq:

Ataatsimut isigisumik pingaaruteqarpoq oqimaaqatigiissaarinissaq takornariartitsinermit Avannaata Kommuniani ineriartortitsinissamik kissaataasuni, pilersaarusiortuarnermik, nukinnik pigisanik peqqissaartumik nalilersuinerit ataqatigiissaarinernillu, pinngitsoorumallugit ilinniartitaanermi politikimi pitsaanngitsunik kinguneqartitsinnaanerit. Ataqatigiissaagaasunik piujuaannartitsisunillu aallaaveqartunik takornariartitsinermit ineriartortitsineq aalajangiisuvoq aningaasarsiornikkut siuariartortitsinermit pilersitsiniarnermi, piginnaasanik ineriartortitsinerni nunalu tamakkerlugu suliffissaqartitsinermi.

Ilinniartunut inissiatigut pisariaqartitsineq kiisalu tamatumani annertusaaneq nalilersugaarpiarpoq Perorsaaneermik Ilinniartuup pisariaqartitsinera aallaavigalugu. Naalackersuinnikkut aalajangertoqassagaluarpat Ilulissani ilinniartitaanernik nutaanik pilersitsisoqarnissaanik, maanna ilinniartunut ineqarfiliornissanik pilersaarutaareersut illassusertariaqalissapput ilinniartunut inissiasanik nutaanik, ilinniartut amerleriarnissaannut naapertuuttunik. Ilanngullugulu ilinniartitaanermi nutaanik sanaartortoqartariaqassaaq allaffittalinnik sulisunut ilinniartitsiveqartunillu, kiisalu aamma sulisunut inissianik pilersitsisoqartariaqassallunissaq.

Silaannaap pissusaanut tunngasumik ilinniartitaanermut ingerlatsivimmik Ilulissani pilersitsisinnaaneq

Ilulissat sermersuarmit ilisimatusarnermit ukiut 100-t sinnerlugit qitiusumik ingerlatsiviusimavoq. Silaannaap pissusaanut atsumik ingerlatsivimmik pilersitsinermit pioreersut tamaani immikkut ilisimasat ilisimatusarnikkullu attaveqaasersuutit iluaqutigineqarsinnaapput. Ingerlatsivik tunniussassaqaarsinnaavoq Ilulissani namminermit inuiaqatigiinnut aningaasarsiornermullu, qaffasissunik ilinniagaqartunik ilisimatuunillu nunatta nammineq iluanit nunaniillu allanit nutsuisuunermigut. Tamatumani annertunerulersinnaavaa tamaani kiffartuussinertigut periarfissaqartitsineq suliffissanillu pilersitsiviusinnaalluni. Ingerlatsivik pingaaruteqartumik sunniuteqarsinnaavoq immikkut ilisimasalinngortussanik ilinniartitaanermi, sunniuteqarsinnaasanik silaannaap pissusaani allanngoriartuutit najukkani namminermit nunarsuarmilu tamarmilu tamarmi

³ 2012-imiit nunami tamarmi pikkorissartitsisarnerit tulluuttut neqeroorutigineqartarsimapput: Oqaatsinik pikkorissartitsinerit, aallarnisaasanik pikkorissartitsinerit, takornariartitsinermit aningaasaqarnermik aqutsinerit, takornariartunik sullissisarnermik pikkorissartitsinerit, takornariartitsineq/aallarnisaaneq pillugit pikkorissartitsinerit, takornariartitsinermit nioqqutissanik ineriartortitsinerit, takornariartitsinermit aningaasartuutissanik naatsorsuisarnerit/aningaasaqarneq), takornariartitsinermit ikiueqqaartarneq, takornariartitsinermit tuluit oqaasii/suliffinni kulturi ileqqorineqartartoq, takornariartitseriaatsit/ingerlatsivimmi aalajangersimasumi pilersaarusiortarneq (najukkani inerisakkanik illoqarfiup iluani takusassarsiortitsisarnerit), najukkani ingerlatsiviusartut nammineq angallassisussaminnik ilinniartitsisarput, piniarianik angallassinermik pikkorissarneq. Qajartornermit ilitsersuisussatut pikkorissartitsisarnerissamut piareersaatit suliarineqarput.

iliuseqarfigineqarnerisigut, najukkamilu inuiaqatigiinnik suleqatigiinnermi peqataatitsisinnaalluni, najugaqartut ilisimatusarnermi ilinniartitaanernilu akulerunneqartarnerisigut silaannaap pissusaanut atatillugu, taamalu paasinninnermik annertunerulersitsillunilu peqataanermik annerusumik pilersitsiviusinnaalluni.

Periarfissat:

- Ilulissani silaannaap pissusaanut tunngasutigut ilinniarfiliorneq, nunatsinni ilinniartitaanernik aaqquissuussinernut arlalitsigut naleqarluartuusinnaavoq:
- Ilinniartitaanerit amerlallutillu tamatigoortuuneri: Ilassusiineq silaannaap pissusaanut tunngasumik ilinniarfimmik Kalaallit Nunaanni ilinniagaqartartunut nutaanik periarfissaqartitsilissaaq.
- Najukkami namminermi immikkut ilisimasat: Ilinniartitaanikkut ingerlatsivik tunniussaqaarsinnaavoq najukkami immikkut ilisimasat ineriartortinneqarnerannut, silaannaap pissusaata allanngoriartornera avatangiisillu pillugit ilisimatusarneq eqqarsaatigalugit. Tamanna aalajangiisuuvoq Kalaallit Nunaat silaannaap pissusaata allanngoriartorneranik malussajassummat nalorninaateqaarsinnaasutigut, pisariaqartitsisoqarlunilu nunap nammineq iluani ilisimasassanik piginnaanernillu peqartoqarnissaanik unammilligassat piusut iliuseqarfigisinnaajumallugit.
- Kulturikkut peqataatitsineq: Ilinniartitaanermik ingerlatsiviup siuarsaavigisinnaavai silaannaap pissusaanut avatangiisinullu atillugu isiginiagassat, maani nunatsinni ilinniartitaanernik ingerlatsinermi pisariaqartut. Tamatuma ilinniagaqartut itisinerusunik paasissutissisinnavaa qanoq silaannaap allanngoriartorneranik, taamalu ilisimasat piginnaanernillu unammilligassanut iluaqutigineqarlutik.
- Ilinniartitaanernik avammut nioqquteqarneq: Kalaallit Nunaat nunanit tamalaaniit ilinniagartuunngorniartunik ilisimatuunillu silaannaap pissusaanut ilinniarfimmut nutsuisinnaavoq, tamatumuunilu nunat tamalaat akornanni ilinniarfimmu avatangiisinik nammineq peqalerluni, kulturikkut aamma paarlaasseqatigiinnermi atorneqaarsinnaasunik.
- Ilisimatusarneq aamma inerisaaneq: Silaannaap pissusaanut tunngasumik ingerlatsivik silaannaap avatangiisillu eqqarsaatigalugit ilisimatusarnikkut ineriartortitsiviulersinnaavoq, tamannalu nammineq isumassarsianik nutaanik aaqquissutissanillu nutaanik inerititaqalernermik kinguneqaarsinnaalluni, Kalaallit Nunaanni unammilligassat aaqquissutissaannut sunniuteqaarsinnaasunik.
- Piujaannartitsisumik ineriartortitsineq: ilinniartitaaneq silaannaap pissusaasa allanngoriartorneranik aamma piujaannartitsisumik ineriartortitsinermik, pinngortitap nuannissusianik pingaarutaanillu piujaannartitsiumalluni inuussutitut iluaqutigineqartunik.
- Pitsaassutininik qularnaarisarnerit: Københavns Universitet-imik aamma akuerisaasunik ingerlatsivinnik allanik suleqateqarneq ikiortaasinnaapput ilinniartitaanerit pitsaassusissaannik qularnaariniernermi ilisimatusarnermilu silaannaap pissusaanut avatangiisinullu tunngasuni.

Pilersaarusiulernissamut piareersaatit Silaannaap pissusaanut atatillugu ilinniartitarnissamut: Suliart ilinniartitaanermut Naalakkersuisoqarfimmiit suliaasut ataatsimiititaliamut siunnersuisartumut saqqummiunneqarput. Maannamut naammattunik aningaasaliissuteqaranilu naleqquttunik inissianik siunertamut atorneqarsinnaasunik soqanngilaq. Silaannaap pissusiata allanngoriartornera pillugu ilinniartitaaneq pillugu København-ip Universitetianit pilersaarusiiaasuni missiliunneqarpoq ingerlatsineremut aningaasartuutissat 5 mio. kr.-it missaannut, tassani ilanngunnagit ininut ilinniartitsiviusussanut ilinniartullu inissaannut aningaasartuutissat.

Pilersaarutaasut naapertorlugit ilinniartitaanerup ilaa Ilulissani ingerlanneqartassaaq ilaalu alla København-imi.- Silaannaap pissusaata allanngoriartorneranut kandidatitut ilinniartitaaneq pillugu pilersaarusiiaq Ilinniartitaanernut Naalakkersuisoqarfimmit suliaavoq, København-ip Universitet-ia suleqatigalugu, ilinniartitaanerlu København-ip Universitet-ianit ingerlanneqartussaalluni. Ilinniartitaanerup København-imi Universitet-imi inissisimanissaanut tunngavilersuutaavoq tassani immikkut ilisimasallit pisariaqartut nassaassaanerat, qularnaarumaneqarmallu ilinniartitaanerup aallartinnermiit pitsaassusilimmik ingerlanneqarnissaa, kiisalu aningaasaqarnikkut taamaasilluni akilersinnaanerussalluni. Kisianni København-ip Universitet-iata soqutigaa sulisussanik najugaqavissunik ineriartortitsinissaaq, taamalu ukiut ingerlaneranni suliart maani nunatsinni ingerlanneqarsinnaalersillugit. 1906 -imiilli København-ip Universitet-iata Qeqertarsuarmi Arktisk Stationimi ingerlatarisimavaa ilisimatuussutsikkut misissuinerit nalunaarsortarnerat, suliart taakkua tunngaviupput København-imi Universitet-imik suleqateqarumanermut ilinniartitaanermut matumunnga atatillugu.

Silaannaap pissusaanut atatillugu ilinniartitaanermik pilersitsinerimi piomasagaataavoq aningaasaliissuteqarnissaaq sanaartukkanut ilinniartunut sulisunullu sammisunik, kiisalu ininut ilinniartitsiviusussanut, tamannalu unammilligassaavoq pingaarneq, piomasagaataallunilu ersarinnerusunik misissuisoqarnissaa, takorluukkanik aqqissuussinernik suliniut piviusunngortissinnaajumallugu, sumiiffimmi ingerlatsisuusut suleqatigalugit aqqissuussaasumik.

Eqikkaaneq:

Silaannaap pissusaanut ilinniartitaanermik Ilulissani pilersitsinissami piomasagaataavoq annertunerusunik itinerusunillu misissuinissat, aningaasaliissutissanut aqqiissutissanik sanaartugassallu aqqissuunneqarnissaat immikkoortuupput suussusilersortariaqartut. Illuanilu silaannaap pissusaanut ilinniartitaaneq Ilulissani inissinneqartoq Kalaallit Nunaannut annertuumik naleqalersussaavoq, periarfissiissallunilu ilinniartitaanerni periarfissat nukittorsarneqarsinnaanerini, najukkami namminerim ilisimasanik siuarsaavissinnaalluni, kiisalu silaannaap allanngoriartornerani unammilligassani Kalaallit Nunaannik qitiusumi inissiinnaalluni, avatangiisini siunissami unammilligassat piujuaannartitsisumik aqqissuunneqarnerisigut.

Naggasiut

Misissuinissaaq suliaasiissutigineqarsimasooq naammassineqarpoq. Inernerusut ersersippaat ilinniartitaanernut ingerlatsivissanik nutaanik pilersitsisoqarsinnaanera aqqiissutissaasinnaasuni pissusissamisoornerpaanngitsoq. Misissuinerup ersissimavaa allatigut ilinniartitaanertigut

suliniuteqarsinnaanernik periarfissat naalakkersuinikkut isumaliutigissallugit pisariaqartoq, taakkua aningaasartuutitigut naammassisaqarnerunermik aqutissiuussinnaammata, kommunini avannarlerni marlunni ilinniartitaanikkut pisariaqartitsinerit eqqarsaatigalugit. Assersuutigalugu Ilulissani GUX-imik pilersitsisinnaaneq, nassuiaasiami 2020-imeersumi ersarissumik eqikkaasoqarmat Ilulissani ilinniarnertuunngorniarfimmik pilersitsisoqassappat tamanna Aasianni GUX-imut pitsaanngitsunik kinguneqartussaasoq, ilinniartitaanermut ingerlatsivimmik nutaamik pilersitsisoqassappat imaluunniit SPS-ip illuutai atorlugit ingerlatsisoqalissappat. Taamaattumik inassutigineqarsimavoq Ilulissani ilinniarnertuunngorniarfimmik immikkoortumik pilersitsisoqassanngitsoq, eGUX atorlugit periarfissaareersut saniatigut. Periarfissat allat piusut isumaliutigineqarsinnaapput, anguniakkat kissaataasut pitsaanerusumik anguneqarsinnaassammata.

Aamma ataatsimiititaliamit siunnersuisartumit ineriartortitsiviusussanik siunnersuutininik tigusaqartoqarpoq, isumaliuutigillaqunartunik, ilinniartitaanikkut politikkimi tulleriarisarnermut atatillugu, aammalu ilinniartitaanerni periusissami nutaami maanna suliarineqartumi.

Ilanngussaq 1:

Ataatsimiititaliaq siunnersuinermik suliaqartoq:

Ataatsimiititaliaq siunnersuisartoq katillugit 18-inik ilaasortaqqarpoq, taakkualu suliffinnit assigiinngitsuneersuullutillu ilisimasaqqarfennit assigiinngitsuneersuupput, suliaqartarsimallutillu misissuinernik aamma nalilersuinernik.

Ataatsimiititaliaq siunnersuisartoq aallarniutaasumik ilisimatitsiviusumik ataatsimiinnikuvoq ilaasortat katersuuffigisaannik. Tamatuma kingornagut ataatsimiititalianik ataatsimiititaliap ataaniittunik 5-inik pilersitsisoqqarpoq, ilaasortat piginnaasaannik aallaaveqqartunik katitsigaasunik.

Ataatsimiititaliat ataatsimiititaliap siunnersuisartup allequtarisai tallimaasut pilersinneqarput:

Ataatsimiititaliaq allequtaasoq inuussutissarsiutinut ilinniartitaanernik sammisaqartoq,
Ataatsimiititaliaq allequtaasoq nipilersornermik ilinniartitaanernik sammisaqartoq,
Ataatsimiititaliaq allequtaasoq ilinniarnertuunngorniartarnermik sammisaqartoq,
Ataatsimiititaliaq allequtaasoq qaffasinnerusunik ilinniartitaanernik sammisaqartoq, kiisalu
Ataatsimiititaliaq allequtaasoq tunngaviusunik ilinniartitaanernik sammisaqartoq.

Naggasiullugulu inaarutaasumik ataatsimiititaliami siunnersuisartumi ilaasortat inaarutaasumik ataatsimiipput.

Siunnersuisartutut ilaasortat inuussutissarsiutinik ilinniartitaanernut sammisut ukunanggaaneerput:

- GUX-Asiaat
- Perorsaanermik Ilinniarfik
- Qeqqata Kommuniata nipilersornermik ilinniarfianiit - Serravik

Kommunit Ataatsimiititaliami siunnersuisartumi sinniisoqartut:

- Avannaata Kommunua
- Kommune Qeqertalik

Kattuffiit ataatsimiititaliami siunnersuisartumi sinniisullit:

- Qitiusumik ilinniarfiit ataatsimut siunnersuisoqatigiivi
- Nunaqavissut Suliffiutillit Kattuffiat - NUSUKA
- Sulisitsisut - GE

Naalackersuisoqarfiit ataatsimiititaliami siunnersuisartumi sinniisullit:

- Aatsitassanut Inatsisillu Atuutinneqarnerannut Naalackersuisoqarfik
- Isumaginninnermut, Suliffeqarnermut Nunamullu Namminermet Naalackersuisoqarfik
- Nunanut Allanut, Inuussutissarsiornermut Niuernernullu Naalackersuisoqarfik

Suliffeqarfiit ataatsimiititaliami siunnersuisartumi sinniisoqartut:

- Nalik Ventures
- Visit Greenland

- Royal Greenland

Ilinniarnertuunngorniarfinni siunnersuisoqatigiit ataatsimiititaliami siunnersuisartumi sinniisuat:

- Ataatsimiititaliaq – Ilulissani Ilinniarnertuunngorniarfik

Nipilersornermik ingerlatsisut ataatsimiititaliami siunnersuisartumi sinniisui:

- Nipilersornermik namminersorluni ingerlatsisoq
- Nipilersornermik aamma kulturimik namminersorluni ingerlatsisoq